

CONVENIO DE COLABORACIÓN ENTRE A CONSELLERÍA DE POLÍTICA SOCIAL DA XUNTA DE GALICIA E A UNIVERSIDADE DE SANTIAGO DE COMPOSTELA, PARA A REALIZACIÓN DO PROGRAMA “CORRESPONDENTES UNIVERSITARIOS”.

Santiago de Compostela, 24 de abril de 2019

REUNIDOS

Dunha parte, D^a Fabiola García Martínez, conselleira de Política Social en virtude do Decreto 98/2018, do 26 de setembro, do 13 de novembro, do seu nomeamento, no exercicio das facultades que lle confire o artigo 34 da Lei 1/1983, do 22 de febreiro, do normas reguladoras da Xunta e da súa Presidencia e o artigo 2 da Resolución do 8 de abril de 1991, pola que se publica o acordo do Consello da Xunta de Galicia do 27 de marzo de 1991 e de conformidade có establecido no Decreto 88/2018, do 26 de setembro, polo que se fixa a estrutura orgánica da Xunta de Galicia e co Decreto 176/2015, do 3 de decembro, polo que se establece a estrutura orgánica da Consellería de Política Social.

E doutra, D. Antonio Lopez Díaz, Reitor da Universidade de Santiago de Compostela segundo nomeamento efectuado polo Decreto 57/2018, de 31 de maio, (DOG do 5 de xuño), actuando en nome e representación da mesma en virtude dos poderes outorgados polo artigo 20 da Lei Orgánica 6/2001, do 21 de decembro de Universidades, e do artigo 82 do Decreto 14/2014, do 30 de xaneiro, polo que se aproban os Estatutos da Universidade de Santiago de Compostela, con CIF Q1518001A e sede social no Colexio de San Xerome, Praza do Obradoiro s/n, CP 15782 de Santiago de Compostela

As dúas partes, no nome e representación en que concorren e coa capacidade legal para este acto.

EXPOÑEN

I. Que a Consellería de Política Social, segundo o Decreto 176/2015, do 3 de decembro, polo que se establece a estrutura orgánica da Consellería de Política Social, é o departamento da Administración autonómica ao que lle corresponde, de conformidade co Estatuto de Autonomía e coa Constitución, propoñer e executar as directrices xerais do goberno no ámbito do benestar que engloban, entroutras, as competencias en materia de xuventude, correspondendo á Dirección Xeral de

Xuventude, Participación e Voluntariado, entre outras funcións, a xestión das actuacións en materia de xuventude, así como as políticas xuvenís de carácter interdepartamental e de apoio ao desenvolvemento da actividade xuvenil, o fomento da participación da xuventude na vida social, o seguimento na xestión da Rede galega de información xuvenil e a súa promoción e desenvolvemento e a coordinación das funcións informativas e de documentación dos servizos da Rede galega de información xuvenil.

A Consellería de Política Social ten interese en colaborar na promoción de actuacións de difusión da información que faciliten o acceso do alumnado da Universidade de Santiago de Compostela aos recursos existentes en materia de xuventude, a través da implantación de correspondentes universitarios.

II. A Consellería de Política Social e a Universidade de Santiago de Compostela están de acordo en facilitar a participación dos/as alumnos/as desta Universidade que o desexen, no programa "Correspondentes Universitarios."

O chegaren as partes a un acordo e recoñecerse mutua capacidade, outorgan o presente convenio de colaboración conforme as seguintes



CLÁUSULAS

Primeira. *Obxecto do convenio*

O obxecto do presente convenio é establecer a forma e condicións de colaboración entre a Consellería de Política Social e a Universidade de Santiago de Compostela para a posta en marcha do programa "Correspondentes Universitarios" entre o seu alumnado.



Segunda. *Programa Correspondentes Universitarios*

O programa "Correspondentes Universitarios" ten por obxecto difundir a información xerada desde a Dirección Xeral de Xuventude, Participación e Voluntariado da Consellería de Política Social entre o alumnado das distintas universidades galegas, favorecendo a participación dos mozos e mozas tanto na elaboración como na difusión da información entre iguais.



Os destinatarios do programa son os/as mozos/as que cursen estudos en calquera das facultades das universidades galegas, nos seus distintos campus.

As funcións dos/as correspondentes universitarios son as seguintes:

- Xestionar un taboleiro informativo no que haberá información sobre temas de interese para a xuventude e difundir a información na/s facultade/s na/s que estudan e/ou nas máis próximas.
- Difundir a información sobre os distintos programas e iniciativas para a xuventude que haxa no portal <https://xuventude.xunta.gal> e/ou aqueloutra que reciban a través dos medios ao seu alcance: redes sociais, compañeiros da residencia, facultades, institutos, etc., e que sexa de interese para eles.
- Asistir ás reunións de coordinación que se convoquen, así como aos cursos de formación organizados pola Dirección Xeral de Xuventude, Participación e Voluntariado e destinados aos correspondentes xuvenís.
- Aqueloutras que supoñan a mellora na achega de información á mocidade.



Terceira. *Compromisos da Consellería de Política Social*

A Consellería de Política Social, a través da Dirección Xeral de Xuventude, Participación e Voluntariado, asume os seguintes compromisos:

- Facilitará aos correspondentes universitarios, xunto coa Universidade de Santiago de Compostela, a formación básica en materia de información xuvenil e voluntariado, subministrando a citada formación, así como toda a información en materia de xuventude e participación social que sexa de interese para os/as universitarios/as.
- Designará aos profesionais que actuarán como coordinadores do programa, entre o persoal do Centro Coordinador de Información Xuvenil dependente da Dirección Xeral de Xuventude, Participación e Voluntariado.

Estes profesionais informarán, orientarán e asesorarán aos correspondentes universitarios, individualmente ou en grupo, facilitándolle a axuda necesaria para participar no programa e na



difusión das actuacións do mesmo. Así mesmo emitirán un informe de horas de colaboración prestadas por cada un dos correspondentes universitarios rexistrados pola Universidade de Santiago de Compostela.

- Seleccionará o alumnado do programa "Correspondentes xuvenís". Fixarase un máximo de alumnos por centro e a selección, respectando este máximo, farase por orde de inscrición.
- Organizará unhas xornadas de formación e orientación dos correspondentes xuvenís de 2º de bacharelato nos campus da Universidade de Santiago de Compostela.

Cuarta. *Compromisos da Universidade de Santiago de Compostela*

A Universidade de Santiago de Compostela, a través da vicerreitoría competente en materia de acción voluntaria, asume os seguintes compromisos :



-Informará sobre as actividades e obxectivos do programa "Correspondentes Universitarios" a través dos medios utilizados para a promoción do voluntariado e a participación social (páxina web do SEPIU, correo-e, pantallas informativas dos distintos centros, etc).

-Rexistrará ao alumnado interesado en colaborar como correspondente universitario e facilitará os seus datos á Dirección Xeral de Xuventude, Participación e Voluntariado para a súa selección.

-Incluirá aos alumnos/as seleccionados pola Dirección Xeral de Xuventude, Participación e Voluntariado para colaborar no programa "Correspondentes Universitarios" no seu Rexistro de Persoal Voluntario.



-Expedirá aos seus estudantes unha certificación que acredite a participación no programa "Correspondentes universitarios". Para a solicitude de créditos, ata un máximo de 3 ECTS por ano académico, o alumnado participante no programa deberá ter realizada a formación segundo o protocolo que se recolle no Acordo do Consello de Goberno da USC para o recoñecemento de créditos nos estudos de grao ao abeiro do artigo 12.8 do RD1393/2007 do 5 de xullo de 2016 xunto coa formación básica en materia de información xuvenil proporcionada polos técnicos da Dirección Xeral de Xuventude, Participación e Voluntariado.

-Colaborará coa Consellería a través do Servizo de Participación e Integración Universitaria (SEPIU) na organización das xornadas de formación e orientación dos correspondentes xuvenís.

Quinta. Inexistencia de cargas económicas

Este convenio non implica ningunha obriga de carácter económico para ningunha das partes.

Sexta. Protección de datos de carácter persoal

Os datos persoais recadados neste convenio serán tratados na súa condición de responsable pola Consellería de Política Social coas finalidades de levar a cabo a tramitación administrativa que se derive da xestión deste convenio.

O tratamento dos datos baséase no cumprimento dunha misión de interese público ou no exercicio de poderes públicos, conforme as referencias recollidas en <https://www.xunta.gal/informacion-xeral-proteccion-datos>.

Os datos serán comunicados ás Administracións públicas no exercicio das súas competencias, cando sexa necesario para a tramitación e resolución dos seus procedementos.

A fin de darlle a publicidade esixida ao convenio, os datos identificativos das persoas interesadas serán publicados conforme ao descrito na cláusula décima segunda do presente convenio a través dos distintos medios de comunicación institucionais dos que dispón a Xunta de Galicia como Diarios Oficiais, páxinas web ou taboleiros de anuncios.

As persoas interesadas poderán acceder, rectificar e suprimir os seus datos, así como exercitar outros dereitos ou reiterar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/proteccion-datos-persoais>.



Sétima. Comisión mixta de coordinación e seguimento

Constitúese unha comisión mixta de coordinación e seguimento á que serán sometidas todas as cuestións derivadas do desenvolvemento deste convenio e non contempladas nel e, con carácter previo, aquelas que impliquen desconformidade por algunha das partes asinantes.

A Comisión estará composta, por parte da Universidade de Santiago de Compostela, pola vicerreitora de Comunicación Cultura e Servizos, ou persoa que designe e polo Coordinador do Servizo de Participación e Integración Universitaria.

Por parte da Consellería de Política Social, estará composta pola directora xeral de Xuventude, Participación e Voluntariado, ou persoa en quen delegue e por outra persoa designada por esta.

A propia comisión acordará o seu calendario de reunións.

A Comisión terá as seguintes funcións:

- 
- Con carácter xeral, a interpretación e aplicación das cláusulas do presente convenio, así como velar polo seu cumprimento.
 - Adoptar ou propoñer as medidas necesarias para garantir o exercicio coordinado das competencias de cada unha das partes.
 - Establecer criterios de seguimento e avaliación do programa.
 - Propoñer, para a súa aprobación polos órganos competentes, addendas ou modificacións do presente convenio.

Oitava. Entrada en vigor e período de vixencia

Este convenio entrará en vigor na data da súa sinatura e a súa vixencia prolongarase por un período de catro anos desde esa data.



O convenio quedará extinguido, antes do remate do período de vixencia, por denuncia expresa das partes no caso de incumprimento dos compromisos asumidos nel.

Novena. Causas de resolución do convenio

Serán causas de resolución do presente convenio as seguintes:

- A renuncia de calquera das partes, formulada por escrito con tres meses de antelación ao remate de cada curso académico.

- Incumprimento das cláusulas do convenio.
- Mutuo acordo das partes.

Décima. *Modificacións do convenio*

As modificacións formalizaranse mediante addenda, cos mesmos requisitos e condicións que para a aprobación do convenio.

Décimo primeira. *Réxime xurídico*

O presente convenio ten carácter administrativo e rexerase polo establecido nas súas cláusulas e, no seu defecto, polo establecido na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE do 23 de febreiro para resolver as dúbidas e lagoas que se puideran presentar.

En defecto de acordo entre as partes, as discrepancias xurdidas serán resoltas pola Consellería de Política Social, poñendo os seus acordos fin á vía administrativa, e poderase interpor contra os mesmos recurso contencioso administrativo, segundo o disposto na Lei 29/1998, do 13 de xullo, reguladora desta xurisdición.

Para tales efectos o tribunal competente será o Tribunal Superior de Xustiza de Galicia.

Non obstante, cando unha das Administracións interpoña recurso contencioso-administrativo contra outra, poderá requirila previamente para que anule ou revogue o acto, faga cesar ou modifique a actuación material, ou inicie a actividade a que estea obrigada, todo elo segundo o disposto na Lei 29/1998, do 13 de xullo, reguladora da xurisdición contenciosa administrativa.

Décimo segunda. *Información, rexistro e consentimento para publicación de datos*

En cumprimento do disposto na Lei 1/2016, do 18 de xaneiro, de transparencia e bo goberno, a Consellería de Política Social informará na súa páxina web oficial da subscripción do presente convenio cos seguintes datos básicos: identificación das partes, importe do financiamento, data da sinatura, finalidade e período de vixencia. A sinatura do convenio leva implícita a autorización para o tratamento necesario dos datos e a referida publicidade.

O convenio será rexistrado de acordo co prescrito no Decreto 126/2006, do 20 de xullo, polo que se regula o Rexistro de convenios da Xunta de Galicia.

As partes asinantes do convenio autorizan, así mesmo, que os seus datos persoais e as demais especificación contidas neste convenio poidan ser publicados no Portal de Transparencia e Goberno Aberto.

Este convenio axústase ao disposto na Resolución do 8 de abril de 1991, pola que se fai público o acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares.

En proba de conformidade, asinan o presente convenio, por cuadriplicado exemplar, no mesmo lugar e data que se indica ao comezo.

POLA CONSELLERÍA DE POLÍTICA
SOCIAL
A Conselleira



Fabiola García Martínez

POLA UNIVERSIDADE
DE SANTIAGO DE COMPOSTELA

O Rector



Antonio López Díaz